

Naqqiut

UPA2019/61-imut akissuteqaat 08-05-2019-imeersumut taarsiu
 (Oqaaseqammik naqqiuteqarneq peqqutigalugu)

Qitiusumik kiassaateqarfinnik kissarsuuteqarfinnillu Namminersorlutik Oqartussanit toqqaannanngitsumik toqqaannartumilluunniit pigineqartunik atuisinnaanerup Nukissiorfinnut kingusinnerpaamik 1. januar 2020-mi tunniunneqarnissaanik qulakkeerinneqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Atuisinnaanerup nuunneqarnera ilutigalugu kiassaateqarfinni aningaasat uninngasuutit Nukissiorfinnut nuunneqassapput. Atuisinnaanerup nuunneqarnerani atortulersuutit aserfallatsaalineqarnissaannut pisussaaffit atuuttut allanngortinnejassangillat atortulersuutillu piumasaqaatit Naalakkersuisunit aalajangersarneqartut naapertorlugit aserfallatsaalineqartussaassapput.

Inatsisartuni ilaasortat Anders Olsen, Siumut, Pele Broberg, Partii Naleraq, Nikkulaat Jeremiassen, Siumut aamma Justus Hansen, Demokraatit

Akissuteqaat

(Inuussutissarsiornermut, Nukissiuuteqarnermut Ilisimatusarnermullu Naalakkersuisoq)

Siullermeerinninneq

Naalakkersuisut sinnerlugit qutsavigissavakka Inatsisartuni ilaasortat Anders Olsen, Siumut, Pele Broberg, Partii Naleraq, Nikkulaat Jeremiassen, Siumut aamma Justus Hansen, Demokraatit siunnersuataat pillugu. Siunnersuut aqqutigalugu Naalakkersuisut peqquneqassapput qularnaassagaat kiassaateqarfiit aamma taakkua ataaniittut qitiusumik ingerlatsiviit Namminersorlutik Oqartussanit toqqaannartumik aamma toqqaannanngitsumik pigineqartut Nukissiorfinnut kingusinnerpaamik 1. januar 2020 tunniunneqassasut.

Nuannaarutigaarput Inatsisartut sanaartornermut ataatsimiititaliat suliassaqarfimmut annertuumik soqutiginnimmat, Namminersorlutik Oqartussat kiassaateqarfinnut taakkualu ataani ingerlatsivinnut tunngatillugu, ingerlatsinerullu immaqa suli annerusumik naammassisqaqfiusinnaaneranut sipaaruteqarfiusinnaaneranullu.

Naalakkersuisut politikkiani suliat pingaaruteqartut ilagaat qularnaassallugu naammassisqaqfiusumik isumannaatsumillu kiassaanermik pilersuisoqarnissaa. Erngup nukinga aamma teknologiit nutaat nunatsinni sumiiffinni tamani kiammik pilersuinermi ilaassapput, tamatuma teknikkikut ingerlatsinikkullu ajornarunnaariatornera ilutigalugu aaqqissuussaasumik, aammalu nunatsinni inuiaqtigiiit aningaasarsiorneranni oqimaarsaataanngitsumik naammassineqarsinnaaleraangat.

Naalakkersuisut Nukissiuuteqarnermut aamma Iermik pilersuinermut immikkoortumi pilersaarutaata ilaatut suliaqartoqassaaq aalajangiinissamut tungaviusussamik, qitiusumik kiassaateqarfiiit tamarmik Nukissiorfinnut tunniunneqarnissaat pillugu.

Nukissiorfiit siunnersortit avataaneersut pingasut ikiortigalugit, Masanti, Rambøll aamma Orbicon piffissami 2017-imiit 2018-imut pisortat kiassaateqarfiaat taakkualu ataaniittut qitiusumik ingerlatsiviit katillugit 657-it qanoq issusaat nalilersuiffigisimavaat. Siunnersortit taakkua immikkuullarissunik kiassaateqarfiiit taakkualu ataanniittut qitiusumik ingerlatsiviit illoqarfinni: Nanortalik, Qaqortoq, Narsaq, Paamiut, Nuuk, Maniitsoq, Sisimiut, Kangaatsiaq, Aasiaat, Qasigiannguit, Ilulissat, Qeqertarsuaq, Uummannaq, Upernivik, Qaanaaq aamma Tasiilaq qanoq issusaannik nalilersuiffigisimavaat.

Nukissiorfiit ilanngullugu ilisimatitsissutigaat, suliassat ilaatigut ilagigaat avatangiisinut tunngasumik isiginagiassat asbest-imiik piiyanissaq aammalu uuliaasiviit erngartunngulersut ukiullu 20-it sinnerlugit pisoqaassusillit taarsorsorneqarnissaat.

Nukissiorfiit ersarissumik isumagaat aserfallatsaaliiikkut kinguartooqqasoqartoq kiassaateqarfiiit taakkualu ataaniittut qitiusumik ingerlatsiviit tiguneqarnissaanni. Kinguartooqqaneq tamanna aaqqissuuussamik suliarilluagaasumillu takusaasarnertigut kiassaateqarfinnik taakkualu ataaniittunik qitiusumik ingerlatsivinnik avataaneersut siunnersortit siunnersuisartullu pingasut ikiortigalugit naatsorsorneqarsimavoq.

Pitsaassutsimik nalilersuinerup ersersippaa Namminersorlutik Oqartussat pigisaasa kiassaateqarfiiit qitiusumillu ingerlatsiviit ataaniittut pitsaassusaat assigiinngisitaartuusoq. Sanaartornikkut aningaasaliissutissat tamarmiusut Kangerlussuaq aamma Narsarsuaq ilanngunnagit 133,6 mio. kr.-it missaannik annertussuseqassaaq, sanaartukkut aserfallassimasut iluarsaakkumallugit, tamatumani aamma avatangiisinut tunngatillugu pitsanngorsagassat, assersuutigalugu asbest-iianeq aamma uiliatankit erngangujuortut ukiullu 20-it sinnerlugit nutaanngissusillit taarsorsornerinut.

Nukissiorfiillu aamma Kangerlussuarmi Narsarsuarmilu kiassaaneq ilanngullugit tigussappatigit tamanna ilassutitut 31,6 mio. kr.-inik akeqassaaq.

Sanaartornikkut aningaasaliissutissat eqqaaneqartut saniatigut ingerlatsinermut atatillugu aningaasaliissutissanik killeqartunik 7,6 mio. kr.-it missaannik annertussuseqartunik pisariaqartitsisoqassaaq.

Nunatsinni sumiiffinni tamani kiassanermik ingerlatsineq taamaasilluni 172,8 mio. kr.-inik aningaasaliiffingineqarnissamik pisariaqartitsiviussaaq. Tamakkiisumik innaallagissamik, imermik aamma kiammik pilersuineq Kangerlussuarmi aamma Narsarsuarmi tunniunneqassappata tamanna 243,8 mio. kr.-it missaannik naleqassaaq.

Ataatsimut isigalugu Nukissiorfiit atuisuisa kiffartuunneqarnerat qaffasissuuvoq. Taamaattumik pingaaruteqarpoq, kiassaateqarfiiit taakkulu ataaniittut Nukissiorfiit tigusassarigunagaat, Nukissiorfiit atortuutaat sinnerinut pitsaassutsimikkut naliqissilernissaat, akuerineqarsinnaasumik sillimaniarnikkut naleqartumik ingerlatsineq ingerlaannarsinnaaqquillugu, ilutigisaanillu avatangiisinut tunngasumik piumasaqaatit naammassineqarlutik.

Nukissiorfiit ingerlalluartumik imermik pilersuineq suli qulakkiissagunikku, qaffasissumik pilersuisinnaanermut qulakkeerinnitumik, taakku kiassaateqarfiiit aserfallatsaolineqarsimasut 657-it taakkulu ataaniittut namminersorlutik oqartussanan pigineqartut, Nukissiorfiit atorsinnaallugit tigusassarigunagaat, pitsaassusaasa qaffanneqarnissaat pisariaqavippoq.

Taakku namminersorlutik oqartussanit pigineqartut 657-it kiassaateqarfiiit taakkualu ataaniittut, Nukissiorfimmiit 21 mio. missaannik ukiumut aningaasartuutigineqarnissaat naleqassasoq.

Kiassaateqarfiiit taakkualu ataanniittut qitiusumik ingerlatsiviit atorsinnaanerisa tiguneqarnissaat taamaasilluni kinguneqassaaq aningaasaliissutissanik ilassutinik aningaasanut inatsimmi immikkoortitsisoqarnissaanik, Nukissiorfiit kiffartuussinermut isumaqatigiissutaat annertusiumallugu.

Namminersorlutik Oqartussanit pigineqartut kiassaateqarfiiit aamma taakkua ataaniittut qitiusumik ingerlatsiviit akisussaaffigineqarnerat Nukissiorfinnut tunniunneqassappat pisariaqarpoq qularnaassallugu pisariaqartumik aningaasaliissutissat ilanngunneqarnissaat. Taamaaliortoqanngippat tunniussinermi Nukissiorfiit aningaasaqarnerat ajorseriartinneqassaaq, tamatumalu kingunerissallugu nunatsinni sumiiffinni tamani akinik qaffaanissat, taamalu atuisartut akiligassamik tamatuminnga akiliisinneqassallutik.

Piffissami matunani Naalakkersuisut aamma kommunit akornanni isumaqatigiinniartoqarpoq ineqarnermut suliassaqarfiiup kommuninut tunniunneqarnissaat pillugu. Pissusissamisoorluinnarpoq kiassaateqarfiiit taakkualu ataaniittut ilanngullugit tunniunneqarnissaat suliami tassani ilanngunneqassappat. Ataatsimullu isigaluni tamatumunnga atatillugu isumaqatigiinniarnerni taakkunani pisariaqarpoq qularnaassallugit ingerlatsinermut aamma sanaartornermut aningaasartuutissat, kiassaateqarfinnut ataaniittuullu ingerlatsivinnut Namminersorlutik Oqartussat pigisaannut atatillugu.

Suliassaqarfimmi tassani suliat aallaaveqarput iternga tikillugu inissianik ingerlatsiviup nalilersuvigineqarneranik, taaguuteqartumik “Inissianut pilersaarutinut tunngaviusut”. Tamannalu ilaatigut ingerlanneqarpoq Naalakkersuisut kommuninik oqaloqateqartarnerinik Naalakkersuinikkut ataqtigisiassaqatigiinni januar 2019-imi.

“Inissianut pilersaarutinut tunngaviusut” iluanni ilaapput qulaajaalluni suliat maanna ingerlatsinermi killiffiusut pillugit, siunissami pisariaqartitsineq pilerumaartoq, inuiaqatigiit ukioqqortussutsimikkut qanoq agguataarsimaneri aamma aningaasaqarneq. Suliat taamaasillutik annertunerupput Namminersorlutik Oqartussat attartortsittakkanik inissiataasa kommuninut tunniunneqarsinnaaneriniit, kisiannili tamannarpiaq suliani qitiusumik inissisimavoq.

Isumaqaqluarpoq kiassaateqarfinnut taakkualu ataani ingerlatsivinnut tunngasumik suliassaqarfiiup isumaqatigiinniarnerni Nukissiuuteqarnermut Imermillu pilersuinermut suliassaqarfimmi immikkoortumut tunngatillugu ingerlanneqartuni akulerunneqarnerat ataqtigisiassaagaasumik.

Tamanna tunuliaqutaralugu Naalakkersuisut matumuuna imaattumik allannguutissatut siunnersuuteqassapput:

"Inatsisartut aalajangiiffisassaattut siunnersuut, Naalakkersuisut peqquneqassasut qularnaassagaat siunissami piginnittuuneq aamma ingerlatsinermut akisussaaneq (Kiassaateqarfinnut qitiusunut) toqqaannartumik aamma toqqaannangitsumik Namminersorlutik Oqartussanit pigineqartut kiassaateqarfiit taakkualu ataanniittut, pisortat inissiaataasa attartortsittakkat ingerlanneqarnerisa nuunneqarsinnaaneri kommuninut isumaqatigiinniutigineqarnerannut ilanngunneqassasut. Suliassaqarfiup nuunneqarneranut atatillugu aningaasaqarnikkut suliat kingunerisassaat kommuninut ataatsimoortumik tapiissutit isumaqatigiinniutigineqarnerannut ilanngunneqassaaq".

Taamatut oqaaseqarluta siunnersuut Inatsisartunut suliassanngortipparput.